

OTHIERI E-I SA FESTA DE SU RIMEDIU

Othieri, galana ses reina
de su nobile e forte Logudoro;
e de tottu nde faghes unu coro
pro venerare sa Mama Divina.

Sa zente tua onesta bella e sana,
operosa e gentile e sempr'istada;
e nde ses cun rejone imbibidiada
e meritas sos bantos chi ti dàna.

Tue ses assentada a mesu die
in pettus d'unu monte, che fiore:
gasie riparada e cun amore
t'affaccias che bajana rie-rie.

Sa terra tua rendet a iepantu,
unu pro chentu cun sas grascias dada;
e tenes donzi tanca populada
de fiados chi giunghen tottu a bantu.

Paret de su Rimediu sa Santa,
sa ch'onoras in modu singulare,
chi hapat postu pro ti vigilare
sos tres montijos chi giughes accanta.

Sas dies da sa festa tue lassas
de sos tribagljos tottu sos ardores;
e cun milli armonias e colores
laudende a Maria ecco t'ispassas.

De Grisoni in su cantaru dicciosu
ognunu appuntat, buffat, si ristorat:
cun cuss'umore paret ch'assaborat
su coro 'e Othieri generosu.

PERA SULIS

(Nuoro)

TONARA

Pera Sulis